



# 林子瑋 同學

閩南語 · 短篇小說 · 學生組

第二名

得獎作品

得有

## 得獎感言

2003年春天，阮出世佇彰化縣溪州鄉，「得有」這個題目窮實著唸「tit iú」，為怎樣我會按呢落題目？因為佇阮捌代誌開始，看阮阿公日常就是擺恬恬、真興去食酒，頭先阮嘛無理解講是按怎阿公欲按呢損蕩家己ê身體，bué-lâu來才知影彼是彼沿ê查埔人解憂愁上有效ê方法。阮阿公名號做「德有 Tik-iú」，名是阿祖講生三个後生「群龍得有三寶」，阮阿公排第二，總是，叫「得有」名寫起來無好看，所以後來號「德有」，原仔阮真感謝阿公陪伴阮12冬，佇我國校六年彼陣，阿公離開人世間。

這篇小說主角、講話--ê是阮阿公，彼是國校彼陣我定定和阿公開講，阿公和阮ê對話。可能遮有寡物件老爸彼沿、甚至阿媽嘛擺母知，阿公是一個心事擺囷佇心內底ê人，這馬閣想起來，我會感覺毋甘。

這是阮第一篇小說作品，嘛是2023年 tng-lâi Tâi-gí-hē 我感覺家己該當就愛完成ê一個任務，家族仔內面，佻濟怨恨、疼惜、悲傷、鬱卒……這擺 thing-hó 成做性命ê養份，內底嘛會當看著一寡阿公ê虧欠，伊ê名意思是「得有」毋過家己煞感覺「虧欠」，人生咱到底欲愛追求--ê是啥物--leh？

寫這篇作品 m-nā 欲寫故事，嘛想欲透過這個方式去和這馬少年人講咱有影愛換一個角度去體諒咱ê序大，in 有 in 生長ê時代背景，就是因為按呢，in 今仔日有彼款性地、脾氣。這篇小說是阮這口灶彼一兩冬吵家拈宅、無安寧彼段，總是彼段阮猶國校三年，規个歇寒（寒假）

予這 tsân 代誌舞甲根本就無歇著，會怨厝內人無？阮欲照實講，頭先會，毋過閣較捌代誌了後，我感覺著共伊寫落來，彼是性命獨一無二 ê 養份，人攏講我 ê 個性、脾氣「老起來等」，可能佢這嘛有關係 --lah！

高中二年，「影像閱讀」老師 tshuā 阮去電影院看「超級大國民」電影彼擺阮印象真深，我看著彼款影像描述手路，主角因為白色恐怖受著迫害出獄攏恬恬、心事無人知，若像看著阿公 ê 背影，所致日常我攏會一 tsân 代誌做煞，思考、閣再反省幾若遍，這篇小說是用類似 ê 手路去寫 --ê，阿公在生無講出喙 --ê，我這個做孫仔 --ê，寫落來 --ah！阿公，你敢有看著？

這擺著等，真感謝嘛真感動，阮阿媽佇今年，2024 舊曆過年前嘛來離開人世間，我是阿公阿媽 tshuā 大漢 --ê，和阿公阿媽真有話好講，真毋甘！寫，是記錄人生，彼段雖然阮猶是囡仔 niā-niā，毋過攏有 leh 看 --lah！家和萬事興，代先咱需要去為厝內每一個人設想，若攏事事項項看一个方面 niā-niā，按呢可能厝內永遠袂安寧。

世事袂得圓滿，人生儂得齊全。阮認為踏出去每一步所留落來 ê 跔跡 phīng 代誌 ê 結果閣較重要！上尾，若是今仔日阮閣會當見著阿公阿媽，阮會想欲對 in 講：「阿公、阿媽，感謝有恁陪伴、疼痛，若無恁，阮毋知影遐爾仔濟做人 ê 道理，好來好去、毋通看人無，這是正經上重要 --ê，嘛是恁實際做予阮看 --ê，未來，雖然無恁 ê 陪伴，毋過阮會用恁對阮 ê 彼款疼惜，去疼惜別人。團圓做伙，誠懇交陪！」繼續寫，寫咱 ê 心聲、用咱 ê 氣口寫落來！嘛邀請逐家！

# 得有<sup>1</sup>

一、

大漢查某团來揣我，75歲這冬，伊會 hiông-hiông 走倒轉來，是為啥物？強強欲 50 年 ê 情，怎樣拆分明。

二、

小弟姓李、名得有，自細漢出世佇散食人兜，我無感覺家己悲哀，顛倒用心經營家己 ê 人生，就算讀國民學校彼陣攏著和人同齊 bih 防空洞後壁補校閣愛和人學啥物三民主義，總是佇遐凝攏無彩工，十五歲彼冬一 kha 皮箱和厝內人心內 ê 向望伴阮到臺北大稻埕。

Se-bí-loh 和我這世人結緣誠深，tann 到大稻埕啥物攏毋捌，聽人講大稻埕彼片有人欲收師仔，tsuánn 想講來去看覓仔有啥物好和人學 --ê，一个躉膽共行入去一間「明義西服」，一下行入去碰著一个大 --ê，「佗一个菁仔穰！」伊越一下。阿義師 tng leh 共這個地頭大 --ê 試 se-bí-loh。

「少年 --ê，遮毋是恁兜灶跔，閃。」

「無 --lah……阮是欲來綴師 --ê 學功夫。」

「你佗位 ê 人？」

「雲林西螺彼搭。」

「喔！我有親情嘛佇西螺，就當做是咱有緣，講著情是一世人咱攏著學 --ê，看你古意古意，我看 án-ne 好，你若想欲做師仔你就來綴 -- 我，我將功夫放 hōo-- 你，學免驚 --ê。」

「多謝師 --ê！」

就 án-ne，我綴阿義師到出師，嘛因為初次見面熟似彼个大 --ê，阿義師共人脈擺放 hōo 我這個唯一 ê 徒弟仔，受阿義師肯定阮真歡喜，生活會愈來愈好，我嘛相信天公疼戇人，彼陣感覺阮庄欲出 gâu 人，彼就是阮李家 gâu 教囡，擔著困難啥物擺毋驚 ê 人生態度。

### 三、

1953 耕者有其田政策實施了後，阮兜田地因為擺 hōo 別人去種，致使田地無去了了，厝內一張批到我 ê 手頭：

得有：家父身體欠安，請速回。三寶

看著這張批信，閣想著厝內大兄閣佇金門做兵，我這個排第二 --ê，無彼款無轉去庄跔 ê 理由，想袂到轉去到厝……

一下到門口埕，我看著老爸坐佇椅條。

「得有啊！你轉來欲創啥？」

「三寶講你身體出狀況，是按怎 sinn？」

「Kah 奇？身體勇勇逐工閣通去店仔食燒酒會按怎？」

「Án-ne 三寶共我騙，阿義師本成交代我 ê 代誌我擺推推掉 --ah neh！」

「毋是伊共你騙，是我欲叫你轉來相親成家。」

「是按怎？」

「你嘛二十 thóng--ah！會當做老爸 --ah！你嘛需要娶一个某、生後生傳宗接代，恁 i--á 會去搵媒人婆介紹，時到你才聽恁 i--á 安排，這安排我無 tshap 手。」

因為 án-ne，人安排我去雲林蔴桐庄廖家和人相親，透世人毋捌相親過，有影礙虐，人攏講我這個人傷過古意，凡勢有影是 án-ne。

「人無愛嫁 hōo 彼个瘦閣薄板 --ê lah！」阿淑對老爸（阮叫金獅淑）án-ne huah。

「你生做 tsiah bái，有人欲娶已經愛偷笑 --ah！án-ne 欲嫁 -- 無？」金獅叔對查某囝講。

因為阿螺孀（阿淑老母）早前是西螺街仔 ê 人所以真向望這 tsân 婚事會當圓滿，我是無啥物看法，戇戇，序大講啥我就做啥，聽序大講，阿淑知影我是做 se-bí-loh--ê，走來溪州共我偷看幾若擺，相翁婿。

真緊，阿淑 tìm-thâu 欲嫁 -- 我，我無啥物娶某錢，錢攏 hōo 爸母做所費，所以勉強和人參詳 suè 一台烏頭車對蔴桐共阿淑 tshuā 來溪州。

「恁規庄頭攏無牽電，嘛無自來水，叫我煮飯欲按怎 sinn？」阿淑問 -- 我。

「你問看 i--á、嫂仔攏按怎處理，逐家煮飯照輪，我攏負責食 niā-niā。」

「查埔人 --honnh！我共你講，我袂 hōo 你疊姓，你免數想食我夠夠。」

「彼無差 --lah！橫直 tsiàng-sî 你是阮牽 --ê。」

和阿淑成做翁仔某翻轉年，做人老爸 --ah！這款滋味，麻油芳 --lah！阮共頭一个查某囝號名做「味香」。

#### 四、

「ma ~ ma ~」車 tú tshah 好，初五早起淨華那哭那入來厝共我攏牢牢。

2010 新正年頭，逐家歡歡喜喜過年，家家戶戶團圓。結果阮 suah 是吵吵鬧鬧 ê 開始。伏魔大帝啊！著 tàu 保庇，淨華是阮李家排第三 ê 查某团，這擺講大漢彼个轉來附身 tī 淨華身上，敢正經 --ê ？

阮 ê 序細知影味香 ê 較少，因為是傷心事，我嘛罕得提起，驚淑仔會艱苦。

講 bóng 講，彼工厝裡真「鬧熱」，連我家己都母知家己是母是人 --ah。新正 niā-niā，虧欠 ê 感覺，心內萬分痛苦，想嘛母捌想過我愛遮爾煩惱後生查某团，做得來 --ê lah。

## 五、

「Ngóo！乃是恁敬拜 ê 伏魔大帝！李淨華 ê 性命恐驚不保，在座眾人著有心理準備。除非奇蹟，若無恁兜 liam-mi 著辦後事，母通 tèn-tshenn。」這個伏魔大帝，hōo 阮分袂清楚是真是假，因為無法度去分拆靈體 ê 想法，是人總是有限制。

已經母是頭擺 án-ne--ah，我一直感覺淨華身體強欲袂堪得，一時仔太子爺、一時仔王爺公、一時仔媽祖婆，阮查某团淨華走去 tah-lòh？攏無一个人抑是神來和我講。

彼工淨華轉來了後，逐時辰就攏講有無仝靈體欲共附身，母知是因為平常時伊較無 leh 積陰德抑是今年逢 9 不利，阮团婿阿賢自彼工到今 tshuā 伊陸續去 hōo 幾若間大間病院精神科看，淨華轉來厝裡，無一日是無食藥仔暍去 --ê。講是 án-ne 講，做老爸看著真母甘。

淨華細漢就是一个真捌代誌、體貼、足 gâu sai-nai ê 囡仔，20 歲彼陣伊講伊欲出嫁我真反對，thài 會知伊是先共人有才來和阮做爸母 --ê 講，bô-ta-uâ，在伊去嫁 hōo 阮彼个团婿阿賢，阿賢厝裡真有額好 hōo 開工廠，阮細漢後生阿城嘛捌去遐做一站工，我有去臺北偷偷仔共觀察過一兩改，總是，阿賢凌遲家己 ê 舅仔敢叫是我這個做伊丈人爸 --ê 攏母知？



彼陣阿城對臺北倒轉來，心內真濟苦楚，阮爸仔囡有講一睷。

「爸仔，我欲轉來揣頭路，臺北彼片我無愛閣去 --ah！」

「半病仔！做無一項好，恁姊夫仔是有虧待你 hioh？」

「毋是這個問題，我對 in 嘛攏真敬重，毋過阿姊、姊夫佇工廠邊閣開地下 kiáu-king，我若共 in 贊聲、鬥做代誌，án-ne 我是毋是嘛變做共犯？」

「你去遐攏為恁姊仔 in 做啥？」

「In 照輪班制，有當時仔我一工著做十七八點鐘、有當時仔做半暝工，我實在嘛驚家己身體袂堪，逐工攏這欸生活，家己嘛略仔毋怨 --lah！」

「Hàinn！若你講 --ê 攏誠實，án-ne 轉來家己厝嘛好，我毋知 in 佇臺北攏做這欸僥倖代，做老爸 --ê 教囡失敗，對你嘛是虧欠 --lah，tsiàng-sî 嘛不便講啥。」

我知阿城彼欸毋怨，阮心內嘛有虧欠，伊自細漢國校攏提頭名，國中老師講因為伊佇學校攏講臺語、罰伊做勞動服務、bán 規校園 ê 草，外省老師共 in 講成績若欲好著放學去市內老師厝裡另外補習，彼陣阿城共我討 100 kho，毋過因為厝內五个囡仔攏需要食穿，閣我家己和阿淑愛簽「阿樂仔」，了袂少，無 lân-san 錢 hōo 阿城去補習。我想，檢采阿城對我這個做老爸 --ê 會有失望，是我共講去做烏手 --ê，伊對家己真有寄望想欲趁閣較濟 hōo 厝內生活較好寡毋才去臺北綴 in 姊夫。

定定聽人 leh 講「現世報」，淨華！少年時你是按怎欲 hiah 行毋知路。

## 六、

「眾弟子聽我令，信女李淨華身陷重重難關，著開始準備後事。」慈善堂童乩 khí-tàng án-ne 指示。講 suah，王梨提起來對淨華頭殼 hám--lòh-khì，額頭規 tah 紅紅，轉來厝裡就

親像是一 sian 活死人，在靈體控制，後一个欲來 ê 靈體逐家攏毋知是啥人。

走幾若間人 ê 私人宮，逐家攏講這是無藥醫、業障傷重逐年人 leh 普 in 嘛攏無去贊普，無法度，án-ne 我 kan-na 一條路好行，來去廟 -- 裡求伏魔大帝。

「伏魔大帝，弟子得有這世人攏做好代，甘願折壽救阮查某团淨華，我死無要緊，拜託你！拜託你救阮查某团 lah！」天公爐佇彼時發爐，我 ê 「大哥大」 leh liang。

「爸！你緊轉來！淨華閣 hōo 一个講是恁查某团 ê 附身！阮有阿姊？媽走入去房間底 bih，共伊問伊都毋講，逐家攏 sa 無 tsáng。」阿城敲 -- 來，吩咐我著趕緊轉去，我毋知影是按怎這改來 --ê 是講阮查某团 --ê，liâm-mi oo-tóo-bái 騎 --leh 轉去到厝。

「爸仔！爸仔！」淨華，嗯……毋著，毋是淨華，是共伊附身 ê 靈體，那哭那 ai，走過來共我攏 --leh，我規个起雞母皮。

「你啥物人？」

「恁查某团啊！敢袂認得？」

「啥物阮查某团？」

「爸你共阮放袂記得？大漢查某团」

「味香？你轉來欲創啥？」

邊仔阿城和阮另外彼幾個查某团聽著感覺奇怪。

「爸仔，阮有阿姊叫味香？」阿城問。

「講起來話頭長，自本我是攏無想欲和恁講，拄著就拄 -- 著 --ah！好 --lah！恁有一



个大姊叫味香，出世三歲就過身去 --ah ! 彼陣厝裡無錢好請先生來看，是我做老爸 ê 無路用……虧欠 -- 你 --lah ! 」講到遮，我目屎強強欲津落來，我母是一个好 ê 老爸，人生悲哀。

## 七、

味香三歲，阿淑彼陣大腹肚，厝裡因為彼進前一站我欲 tshuā 阿淑上北，厝內爸母反對和我講：「恁阿兄小弟規工好跤好手母好好仔作穡有孝爸母，你閣欲去臺北，準欲放阮兩個老 --ê gō--sí 是 -- 母？」聽著心內雖然母怨母過落尾留落來庄跤種作，臺北彼月，我定定寫批和阿義師往來，阿義師批裡對阮是鼓勵，和阮講逐冬過年前起來臺北一逝共伊鬥相共趁一寡好過年。總是，世事袂得圓滿，前幾冬我攏會上北，舊年冬尾阿義師過身，厝內經濟來源 kan-na 我一个 leh 趁，過年前，味香一工早仔起來嗽袂停，阿淑真煩惱。

「我敢會當 tshuā 味香轉去荊桐 hōo 先生看？囡仔病甲遮嚴重，我 ê 目睷皮跳袂停，我轉來共爸、媽借錢 hōo 先生看過幾工才 tshuā 囡仔轉來，你感覺按怎？」阿淑問 -- 我。

「這無要緊 --lah ! 你莫定定轉去 lô 恁老爸老母，別人攏講咱不孝囡兒、你查某囡賊，無你是感覺 hōo 人 án-ne 講真歡喜 --hioh ? 滾水加淋寡就好 --ah ! 咱以早細漢嘛是 án-ne，閣再講，厝內無彼號冗剩錢好請先生人來咱兜看囡仔，查某人就是查某人，想 hiah 濟，是 leh 驚啥？」

彼陣物資欠缺，阿淑逐工嘛真無奈，烏糖水 thàu-thàu--leh hōo 味香食，這母知是啥物病，有當時仔味香原仔會閣瘠响喘，半暝仔我會起來共搭搭 --leh，總是無較好，阿淑去廟 -- 裡求爐丹，食 -- 落 - 去 hōo 囡仔 suah 無較好，面色規个反烏，因為請一擺先生過 -- 來愛了袂少錢，我是想講看敢會自然好，想袂到因為我 án-ne 想，隔無幾工早仔起來，阿淑發現味香叫都叫袂精神。

「死老猴！恁查某囡無氣 --ah lah！閣睏！閣睏！早若知我就無愛聽你講啥物自然好，咱查某囡一个 niā-niā，你是按怎欲 án-ne？」阿淑那 háu 那 huah。

Liam-mi 我鐵馬騎 --leh 去西螺請先生來厝裡，先生講肺炎無食藥、無好好仔調養，閣烏白食偏方，竹篙 tà 菜刀，致使病情惡化，愛準備後事、大漢查某囡無救 --ah。先生吐一个大氣，共阮講：「做人爸母若較精光，囡仔大漢較會成功！」講 suah，就做伊離開 --ah。我跪佇塗跔，喙唸阿彌陀佛，希望查某囡會當好好仔、安心仔離開。

自味香過身彼工，後尾幾若工阿淑袂食袂睏，講我良心 hōo 狗哺 -- 去，家己頭一个查某囡顧甲 hōo 死死 -- 去，真無路用。厝邊隔壁逐家講阮是查某囡就無惜、規頭殼欲共錢提來栽培閣來出世 ê 後生，受著眾人怨嘆我這個無盡責任 ê 老爸，心若親像有血 leh 滴，空喙遮大，敢會好？我嘛真艱苦，想袂到會嚴重甲 án-ne，這款錯誤，一世人無法度彌補，希望天公伯仔後世人愛閣 hōo 我機會來彌補。

落尾落葬嘛真潦草，因為味香 kan-na 3 歲未出嫁，古早人規定無結婚 ê 查某人無法度入公媽牌，因為無錢，阮嘛無共倚牌位，這可能是我這個老爸上對不起味香 --ê。

## 八、

因為實在傷過頭艱苦，所以阮翁仔某決定無欲閣講這 tsân 傷心事講 hōo 接繼 in 遮 ê 小弟小妹知，致使今仔日味香來共淨華附身，我規個人身體無爽快，應該是因為一款虧欠，毋知欲按怎彌補味香，毋過這改我感覺是愛阮坦白講彼當年發生啥物代誌，共代誌好好仔解決，欲 50 年無處理 ê 代誌。

「爸！爸！你攏無來搵我，我家已佇枉死城足寒足寒。」味香借淨華 ê 喙 án-ne 講。

「Kah 今咱是欲按怎？」阿城講。

「若無咱來去地母廟問事，實在毋知大姊這擺轉來目的是啥。」阿賢表情無奈。

我一个人倒佇眠床頂，翻來翻去睏也睏袂去，心憂憂，這時外口傳來一陣聲：

「天清清！地靈靈！退！退！退！」

「啥貨，這馬是按怎？母仔掛一堆香火佇身上提爸仔彼枝柴棍仔欲損 tng-leh 睏 ê 淨華。」阿城走起去阻擋。

「媽！媽！我是淨華 lah！莫共我拍。」這個時陣若像真正是淨華。

淨華寬寬仔坐起來膨椅，電視按開，看新聞台，無任何表情，規个人捱神捱神。

「你敢真正是淨華？」阿淑問。

「是啊，是恁查某囡！媽，我攏毋知你無 hōo 阮遮 ê 囡兒知影 hiah 濟傷心代，我和大姊講足久，就親像去真遠 ê 所在迴迴轉來，你有歡喜無？」

阿淑共淨華攬 --leh，柔柔仔 so 伊 ê 頭，共講：「你永遠是我 ê 寶貝查某囡，我永遠是恁老母。」

「毋過恁大姊 --leh？」我問，因為我真要意味香。

「啥人知這擺是報仇抑是報恩，免 tshap tshap hiah 濟 --lah。」阿淑講。

「爸，媽，我規个人若像是去遊地府閣轉來人間，自今仔日開始我決定改食菜，陰間 ê 情況我看著真著驚。」淨華講。

彼暝，我嘛是想講代誌差不多欲結束 --ah，我 thenn 佇膨椅，毋知是毋是真 --ê，觀世音菩薩出現佇阮兜，手提柳枝，對我 ê 額頭點 2、3 下，了後伊就離開 --ah，雖罔毋知啥物意思，

毋過我想應該是好代，tng-leh 歡喜，味香出現 --ah，伊和我講，枉死城足寒，半責備講阮無燒 1 領裘仔予 -- 伊，我聽 -- 著歹勢歹勢，家己大漢查某团 suah 佇這 50 冬完全欲共放袂記，伊講 suah，微微仔笑，就閣離開 --ah，伊講欲去觀音廟，吩咐我毋通綴。

愈 án-ne 講，我就愈興欲綴伊後壁，一下到觀音廟，我看著味香跪佇廟口觀音佛祖面頭前那哭那向佛祖講無愛小妹嘛過往 án-ne 爸爸媽媽會心疼、不安。佇邊仔看著這款場面，心頭亂 tsau-tsau，味香為著虧欠伊 ê 爸母 án-ne 做，予我目屎含目墘，為著無欲 hông 發現，我 liam-mi 離開味香彼 tah，講嘛奇怪，我佇轉去 ê 路 -- 裡，足濟現實生活已經過往幾若冬 ê 叔仔、伯仔和我相拄相借問，轉去欲到厝 ê 時陣，我 hiông-hiông 聽著阿淑 huah 我 1 聲死老猴，去 hōo 驚一下精神，半暝仔三點外，心內 ak-tsak，阿淑講我眠夢閣會 huah 一寡死人 ê 名。

我煩惱味香，因為我感覺對伊虧欠還都還袂了。這世人無法度還，後世人，敢閣有法度？我今年 75 歲 --ah！liâm-mi 就欲見棺材 --ah！

啥人會知，翻轉工，淨華肉身透早一下精神閣講家己是味香。

## 九、

「恁攏共我欺負 lah！人無愛叫味香，我欲改名！我欲改名！」

淨華可能閣 hōo 味香附身，我早起就坐佇客廳看伊倒佇膨椅睏，心頭一个想法敢會伊 leh 陷眠？我吩咐阿賢掙水共潑。

「爸，哪會連你都欺負我，我這幾十冬敢無夠受凍？恁連一个牌位、一櫬香共我拜就無，kan-na hōo 我流浪在外做孤魂野鬼，án-ne 敢著？」我實在聽聽 --leh hōo 講一下面子佇序細面頭前面子盡掃落地，起毛 bái huah 一聲：「你，出 -- 去！」在場眾人攏掙一趔，阿城共我 tshah 入去房間 thenn。

In 幾個兄弟姊妹 hōo 淨華食安眠藥了，嘛共借入去房間，有閒 --ê 就佇外口討論，我聽著一清二楚，因為房間佇客廳邊仔，我就對縫來聽。

「是講，爸到底是閣有隱瞞啥物？伊規個人看著鬼鬼祟祟？」

「我嘛毋知呢！毋過我感覺大姊無惡意，若無攏已經 hiah 久 --ah，轉來欲創啥？當然是救咱家已兄弟姊妹 --ah！逐家攏是一伙仔，互相鬥相共 --lah。」

「畢竟伊 kan-na 三歲，三歲會行路毋過袂有傷濟心機。」

「我真好玄是按怎佇枉死城伊就袂大漢。照科學來講人攏會綴時代 leh 行。」

「陽壽未盡去枉死城，毋過猶是有人牽教，好，我無去過，你另工家已體驗看覓。」

「夭壽，你真正歹喙，咒讖我去死！」

這個時陣，後生查某团攏 sa 無摠是按怎雄雄 but 出來一个大姊，我 ê 心內誠實毋知閣來欲按怎才好，因為我感覺彼是我對大漢查某团 ê 虧欠，和後壁出世 ê 彼幾個兄弟姊妹無 tī-tāi，總是代誌就已經發生 --ah，做毋著 ê 人是我，我敢閣欲逃避？昨暝眠夢著 hia，予我規工攏 leh 想 he 到底是啥物啟示，飯食袂落，心內感覺虧欠，我親像殺人兇手、死刑犯。

## 十、

虧欠是啥物滋味，我感覺家已虧欠阿義師，無共阿義師交代 ê 代誌完成，無共手藝繼續傳予後一沿，毋過阿義師無恨 -- 我。味香若像嘛是無計較，毋過若愈無計較，我就愈毋知未來欲按怎去面對 --in，講起來實在見笑，七十外的人 leh 想這。

閣是一個暗暝，我和阿淑準備欲睏，我 leh 思考「欠」是欲按怎解決、敢真正有「欠」，阿淑看電視八點檔 tng 精彩。

「你敢會感覺我虧欠味香？」我問阿淑。

「若會可能五十冬前你就反省 --ah，毋免等到這陣，可能你會感覺伊毋是對你腹肚底出來 --ê 無珍惜，毋過彼當陣我 ê 心原仔像刀仔 leh 割，咱彼當陣飼伊到三歲外，本成伊會當健康快樂大漢，落尾，啊！莫講 --lah！加傷心 --ê。」阿淑應。

「若閣問你，敢會感覺咱彼陣無去臺北是大大錯誤，你敢會毋願？」

「thài 袂？我攏感覺家己嫁毋著人，來 tsia 並以早佇濁水溪牽牛閣較痛苦，這是你袂當理解 --ê，阮爸講我傷 bái，無嫁 -- 你無人欲娶，koo-put-jî-tsióng--lah！」

選佗一條路，攏會虧欠，彼陣若去臺北，雖然生活富裕毋過無法來照顧父母，會虧欠。留 -- 落 - 來，散甲欲予鬼掠 -- 去，我會虧欠罔兒毋過照顧父母，落尾一下無細膩失去大漢查某罔。

「我是感覺這馬 án-ne 咱上無食會飽、穿會燒，無像以早彼款散赤 án-ne 就真好 --ah！味香是過去 ê 代誌，有當時仔我會感覺，伊這擺轉來到底是欲討抑是欲？我知 --lah，咱無好好仔 tshiânn--I，毋過無需要怨妒轉來揣淨華報冤。」阿淑講。

「伊毋是 --lah！你莫毋知頭尾烏白講，有寡代誌你查某人毋免知影傷濟。」

「著 --lah！著 --lah！查某人無尊嚴無地位啥物攏無，平平是我生 --ê，攏予恁李家親情迫害，可憐。查某人 ê 運命若永遠活佇查埔人下跤，án-ne 咱彰化袂有周清玉、翁金珠彼款 gió-toh ê 縣長，查某人上好有較毋知事理 --lah！攏恁查埔人較 gâu，較 gâu 毋生罔講，笑破人 ê 喙，你就是 án-ne，啥物代誌攏無愛和我參詳，我敢毋是厝內人？著 --lah！我無姓李。」

「阿淑，你莫想傷濟，有寡代誌我會處理，我是恁翁、咱這間厝 ê 靠山。」我講 suah，阿淑共電視撥掉被掩起來越過去另外一片，無啥欲 tshap-- 我。

我毋是 buai 講，是我面子顧袂牢，講一擺傷心一擺，心 kan-na 會 ná 來 ná 疼 niā-niā，痛苦，阿義師、阿爸阿母、味香，我對不起 -- 恁。



## 十一、

翻轉工，逐家猶是憂頭結面，正月時仔，歡喜袂起來，嘛無彼个心情去親情朋友 hia 行踏。阿賢 tshuā 淨華欲去庄內伏魔大帝 hia 拜拜，去無偌久，阿賢 ká 電話轉來。

「爸！我敢好嘛來認伏魔大帝做契爸？我希望用 án-ne 和神明條件交換看淨華敢會趕緊好起來。」

「無嘛好，你好好仔和伏魔大帝報你 ê 名、生時日月，看伊敢有允你 ê 要求。」

「好，án-ne 我問了若有結果就轉去厝裡。」

過晝，阿賢 tshuā 淨華轉來 --ah，淨華看起來面色無蓋好，規个面青恂恂，阿賢入來和我講發生啥物代誌。

「爸，我頭拄仔去有順利認伏魔大帝做契爸，毋過頭拄仔淨華佇廟 -- 裡若像欲發起來彼款，驚一下我緊藥仔共窒 -- 落 - 去。」

「伏魔大帝欲共附身？」

我 án-ne 一下講，淨華身體閣坐 hōo 直直、頭四箍輾轉幌過來幌過去，若像真正欲發起來彼款，雄雄伊倚起來，手比對我這片過來。

「李得有，恁查某团李淨華這條命我有去共你鬥挽救，恁大漢查某团嘛犧牲真濟，知影是家己厝內人就走去觀世音菩薩 hia 求菩薩毋通共人 tshuā-- 走，恁著知影伊毋是欲轉來害 -- 人 --ê，是欲轉來救 -- 人 --ê，知無？」

「伏魔大帝啊！阮 ê 心真艱苦，敢會使拜託恁救阮可憐 ê 查某团？」

「我有救 --ah！毋過恁大漢查某团李味香較感動 -- 人，你和恁某無應該遐爾仔絕情，閣講

一擺，伊毋是欲轉來討 --ê，是轉來幫贊李淨華，in 第二小妹。」

「好，請示伏魔大帝，án-ne 阮愛閣按怎才等會著淨華轉來？」

「窮實伊佇咱 ê 邊仔綴 leh 聽，我較寡退，伊就會當來附李淨華 ê 身 --ah。」

## 十二、

「爸，枉死城真正足寒，我佇 hia 一个朋友都無，無依無倚，我敢會當入人公媽牌？」

「你欲入阮嘛著先攢紅包擲路中央看有人祛 -- 無。」

「免，我有恰意 ê 人 --ah！這馬聽候 -- 伊看按怎講。」

這是味香閣一擺附淨華身和我講 --ê，我毋知欲按怎處理，共應講：「我這個做序大 ê 為你做主，欲按怎處理，你講？」

「我有看著一个真適合 ê 人，我嘛真恰意，毋過毋知人敢有欲 tshuā 我。」

「啥人？講 hōo 阿爸知影。」

「就……阿賢 lah！」

阿賢嘛佇邊仔，我對阿賢彼片看 -- 過 - 去，伊知影我眼神當中 leh 示意，好回答 --ah。

「大姊，我是感覺你愛看恁小妹淨華 ê 意見。」阿賢講。

「我有和淨華參詳過 --ah！伊講我救伊一命，這馬和伊嘛共體，所以看你敢欲 hōo 我入恁兜 ê 公媽牌。」

「我和阮彼片序大參詳一下，應該是無問題 --lah。」

我聽著感覺照 án-ne 辦應該無問題，邊仔阿淑嘛頓頭，所以我繼續問味香閣需要啥物。

「味香，án-ne 你感覺你閣需要啥物？我來去辦。」

「我欲來改名，我無佻意這個名，爸爸我欲改名 --lah。」

「你欲改啥物名？」

「淨宣，我欲改做淨宣。」

「好，毋過佇人間戶口抄本你已經無佇頂頭，我想，án-ne 這馬咱遮逐家攏聽對我這片過來，以後伊叫淨宣，我這馬宣佈伊叫李淨宣。」

「爸爸多謝你，淨華欲閣活無問題，我嘛會佇伊身軀邊保護伊，爸爸放心。準若伊閣艱苦，叫伊心內 huah 大姊 ê 名，我會隨時出現 --lah。」

我 ê 心頭總算掠較有定，毋過這馬家已大漢查某囡欲閣來出嫁，我看，有通 hōo in hia 兄弟姊妹 bô-îng-tshì-tshà--looh。

### 十三、

今仔日正月十二，七工過 -- 去，人講「十二請查某囡轉來食泔 muài 配芥菜。」今仔日查某囡攏有轉來，阮大漢查某囡嘛附淨華 ê 身和我講伊欲和阿賢上北 --ah ！

這個過年是風波不斷，阿城應該是背後彼个載人載來載去 ê 司機，逐家攏無歇著假，為著兄弟姊妹走從，正經辛苦。

我和阿城、阿賢討論閣來喜事欲按怎辦，阿淑對這層代誌真興欲來討論，liâm-mi 講伊 ê 想法。

「可能辦佇男方彼片較好，咱親情較有 leh 行 ê 招一下同齊去、當做迤迤 án-ne 嘛好。」阿淑講。

「好啊！無就照母仔講 --ê，我彼月序大前兩工仔我嘛問 -- 過 --ah！無問題 lah！」

我無啥物意見，kan-na 講：「啊敢需要大餅？」

阿淑應：「好 --ah，若無叫荊桐後頭彼間自咱少年開到今 ê 餅店，免濟，我是感覺三十塊就好，男方和女方加起來，無食 hiah 濟 lah。阿賢你感覺按怎？」

「好 --looh，無就照母仔講 --ê。」

討論 suah，嘛過晝 --ah。In pau-hók-á 款 --leh 和阮相辭，我毋知這個時陣是大漢查某囡抑是淨華，走過來共我攬牢牢，和我講：「爸，我會足想你，多謝 -- 恁。」邊仔阿淑目屎含目墘，講：「我實在無應該，多謝你轉來救厝內人。」

親像十八相送，黃花風鈴木開 --ah！春天，到 --ah。

彼冬秋天，阮家族仔十外个人駛車對彰化駛車上北，我和阮牽 --ê，76 歲嫁大漢查某囡，向望會幸福，咱到尾有一工嘛會相見，敢毋是？講虧欠無虧欠，我佇彼工問淨華：「恁大姊敢會恨我？敢會感覺我需要彌補伊啥物？我這個做老爸 --ê 感覺足虧欠！」

「袂 --lah！錢財是死不帶去，病疼嘛是死不帶去，人和人往來，欠來欠去，甘願 hōo 人欠，就甘願有一工會還 -- 人。」

這段話，我斟酌共想，人生有真濟代誌無法度放袂記，好 --ê、歹 --ê，可能是假 --ê，毋過「情」是真 --ê，大漢查某囡，佇阮心內，永遠有彼个位是留 hōo 伊 --ê。

虧欠？得有？

註解

1 得有 Tit iú。